

RAD NA OTVARANJU STUDIJA GEODEZIJE U BOSNI I HERCEGOVINI

Obrazovanje geodetskih kadrova bila je stalna briga Saveza geodetskih inženjera i geometara BiH, pa se prilikom razmatranja potrebe školovanja kadrova više spremne, unazad 14 godina, već tada iskristalisalo mišljenje da osnivanje više škole neće biti zadovoljene kadrovske potrebe naše Republike, i da bi bilo bolje odmah pristupiti školovanju kadrova visoke spremne. Medjutim, poznato je da tada za ostvarenje takvog zahtjeva u našoj Republici nisu bili povoljni ni materijalni, a ni kadrovski uslovi.

U proteklih desetak godina gotovo na svim sjednicama Predsjedništva Saveza i na svim skupštinama razmatrano je pitanje stanja kadrova u struci i uvijek je konstatovan manjak kadrova visoke spremne. Na jednoj od sjednica Predsjedništva Saveza krajem 1970. godine donesen je zaključak da je vrijeme da se ponovo pokrene pitanje školovanja geodetskog kadra visoke spremne u našoj Republici, pa je to pitanje pokrenuto kod Republičke geodetske uprave.

U Republičkoj geodetskoj upravi je ovaj predlog naišao na puno razumjevanje, te je tadašnji direktor Uprave drug Kabil Salih formirao "Komisiju za proučavanje stanja i potreba u geodetskom kadru u SRBiH" u slijedećem sastavu:

Predsjednik komisije:

Lukić ing. Vladimir, predstavnik Saveza geod. inženjera i geometara,

Članovi:

- Aganović ing. Ismet, profesor Gradjevinskog fakulteta Sarajevo,
- Smailbegović Dr ing. Fethulah, profesor Rudarsko-tehn. fakulteta-Tuzla,
- Muftić ing. Husein, profesor Šumarskog fakulteta Sarajevo,
- Milišić ing. Antun, direktor Više geod. škole Sarajevo,
- Tadić ing. Fabijan, docent Urbanističko-arhitekt. fakulteta Sarajevo,
- Omerbašić ing. Ferid, predstavnik Republičke geodetske uprave
- Papo Jahiel, načelnik za premjer RGU-e

Sastav Komisije je unapred obećavao da će problem biti temeljito razmotren, i da će njeni predlozi, s obzirom na veliko iskustvo i afirmaciju koju uživa vaju njeni članovi kako u stručnom tako i u društvenom radu, biti konstruktivni i realni.



Komisija na jednoj od mnogih sjednica

Komisija je na svom prvom sastanku, poslije svestranog razmatranja problema, donijela zaključak da se putem ankete prikupe podaci o stanju, strukturi i potrebama geodetskog kadra u Bosni i Hercegovini.

U ovu svrhu pripremljen je anketni list, koji je poslat svim opštinskim geodetskim službama i većem broju organizacija, koje upošljavaju geodetski kadar. Ovom prilikom moramo istaći i zahvaliti se kolegama na odzivu i trudu koji su uložili na prikupljanju traženih podataka u anketi. Možemo slobodno tvrditi da smo blagodareći njima dobili zaista vjernu sliku stanja i potreba, pa je to poslužilo kao pouzdan temelj za dalju razradu problema i za postavljanje dokumentovanog i opravdanog zahtjeva.

Na osnovu svestranog proučavanja problema, mnogih diskusija i prijedloga, te rezultata ankete Komisija je izradila "Predlog za obrazovanje visoko-stručnog geodetskog kadra u BiH" čiji tekst dajemo u nastavku.